

ИЗ ЗОГРАФСКАТА ИСТОРИЯ

ИСТОРИЯ, В КРАТЦЕ О БОЛГАРОСЛОВЕНСКОМ НАРОДЕ

Болгарский народ изиде древле от Чернаго моря, от реки Волги из великия Скандинавии, и зваху ся тамо гимери и кимери. Егда умножиша ся, изидоша первое на овия страни и еще пред Александром Македонским. И л л и р и к первый крал бяхе. Потом же на 3522 [г.] по сотворении мира кралеваше ими крал Б л а д и л и й. Он Филипа македонскаго царя победи и подданна его сотвори. Последи же паки на 3685 [г.] бяху два брата им кралеве Б р е м и Б о л г. Понеже много кралеве надвоеваша и многу землю усвоиша, той народ назва ся по своему именем. А той Брем повоева западную страну и остаха тамо, покрай западнаго моря, Балтийскаго у Помераний, назваша се пеми, словаци, потом же и брандибури. А Болг на восточния страни и земли повоева и усвои и со своим народом посели ся и назваша ся болгары, кои потом со Александром Македонским воюяй, имя им оста ся македоняне. Но паки по Христовом рождестве в царство Уалента царя цариградскаго паки от Волги приидоша и даде им Уалент да ся населиша покрай Дунав.

Паки на 495 [г.] по Христе в царство Анастасия царя греческаго приидоша с великим воинством от Волги и люто разбиша греческаго воинство над рекою Зуртою и усвоиша Тракию, и едва цар греческий со многими дарами смири ся с ними. И отидоша у Срем и тамо Теодориком готским италийским кралем обладани остаха в лето Христово 503. Потом паки в лето 514 приидоша от Волги с В и т а л и а н о м вождом своим и биша Цар град, и цар дарами смири ся с ними, и у Тракию приидоша и поселиша ся. И по нем вожд бе В у к и ч, а по

Вукичи Драгич. Паки в лето 666 множайший от Волги из великия Скандинавий с вождем своим Орбатом в царство Константина четвертаго, тим именем усвоиша всю Тракию и Мисию. И много крат порази воинство греческое той Орбат и на всякое лето дан взимаше от царя греческаго. И престол королевский во Охрите постави; а прежде у Трново владяху и вси идололатри бяху, сиреч идолослужители. И той Орбат велми храбр бяхе и на вся страни, а най-паче с греки. И тогда-разумеша греци како от Волги великия приидоша и назваху их Волгари.

По смерти Орбата наста на королевство Бутая, син его, и он велми беше храбр и тяжкий рат творяше со Юстинианом вторим, и всегда побеждаше, и землю усвоеваше, и дан от царя взимаше, дондеже жив бяхе. По него же наста на королевство сродник его велми храбрый Тревеллий. Он бяхе мудр и свобод, щастлив всюду на войску и непреодолим. Он поможе Юстиниану третьему, когда беше Азимир его изгнал с престола из Царя града и в Херсон заточил. Тревеллий же поиде на Цар град и силою взя и предаде Юстиниану верно. И паки другой пут безчисленнии арапи бяху ударили на царградскую державу. Превеликий отиде с воинством своим отай и нападе на них, и посече от них тридесят и две тысящи, и прогна их от всея держави греческия. Но цар Юстиниан заби толикое добродейание, яже он ему сотвори, но воздвиже бран велию и завоева болгарскую землю. Тогда и Тревеллий собрав свое воинство и би ся с ним и победи и едва сам цар Юстиниан с неколико утече в Цар град. Потом, после той брани, Тревеллий позна бога и крести ся и бист христианин. Он первый от болгарских кралев с народом своим верова и монастыр устрои близ Охрида, и бист монах, и на королевство постави старейшаго сина своего Тербелла. И он бяхе храбр в воинстве, но по некое время обрати ся на идолослужение. Тогда Тревеллий паки взят королевство и сина своего ят и избоде ему очи. И рече: почто погубил еси очи душевния и не видиши светлост вери Хрестови, и не си достоин да зриши телеснима очима слънце и месяц. И постави на королевство сина своего юнейшаго именем Моисея. И рече ему: стрежи ся, сине, да не твориши яко же брат твой, зане очи токмо избодеши хошу, но и главу отрезати. По сем паки возврати ся в монастыр свой и бист святой. Имя ему в монашестве Теоктист, в лето 703 он бист первый христианин и святой от болгарскаго

народа. И Моисей, син его, добр бяхе и силен на бран, и даде великую помощ Лву Исавру, когда бяху срацини пришли на Цар град. Изсече двадесят и две тысящи срацинов и прогна их из греческой области.

По смерти его прият корону сродник его Асен Великий, но время того же Лва Исавра. И имеху любов между собою с царем Лвом, и помощ ему велику сотвори, понеже арапи взяли Армению и Мидию, лучшие земли цареви. Того ради моли Асеня и абие Асен отиде с воинством своим на арапи и безчисленнии порази, и прогна их, и Армению и Мидию усвои и предаде кесарю Лву. И другие арапи убояша ся и не покусиша ся прочее бити ся с греки. И за таковую победу даде ему кесар титу и корону царску. И по нем наста на царство сродник его Добре. Он не беше мирен и много крат сотвори бран с кесарем греческим за землю и за гради. Исперва побеждаше, а после побеждаше ся, понеже оскорбиша ся болгарския боляре на него и убиша его. И окорони са Телезвия. И он не беше щастлив в победе и болше губяше, нежели добиваше. Того ради и его господа убиша и окорониша Савина. Он же сластолюбив бяхе, мир се кесарем сотовори и не радяше да возвратит землю, юже бяху кесари усвоили. Того ради болгарския господа учиниши совет да убият его. Он же разумев, убеже в Мисимврию и тамо до смерти поживе. И прият корону Таган, но и он неугоден и нещастлив у войску. По неколику время изгнаша его и прият корону Телерика, во время Копронима кесаря. И бяхе силен и би ся много крат с царем и землю свою взя. Но болгарии развратиша ся в тое время от иконоборцев и паки сташа идолослужители. Защо бе Телерик мир учинил, и реша да убият его. Он же разуме той совет и бежа в Цар град, и крести ся, и прием ерес иконоборскую, того ради даде ему Копроним сестру свою в жену и сан магистрианства, а господа болгарския даша корону Кардану. И бе стар, имуще лет седм десят, но силний во брани. И много крат би ся с царем греческим и побеждаше, и многу землю взят, и в старости умре.

По нем же наста Крун. Он весма славен бяхе и лют, но идолослужител, и не возможе ему никтоже противити ся. Он разшири болгарскую державу даже до французския земли и уби Борна долматийскаго краля. И возврати ся и удари Цар град, и би его год един, и изсече шест сот тысяч, и взя Андрианопол силою и вся пороби. Понеже кесар Никифор с яростию

поят силное войско свое и от Козл баша и от татар хана, и бия с Круном. Но Крун войско его посече и его самага взят жива и посече, и от глави его чашу направи. И окова ю златом и камением драгим и во время веселия господа здравицу пияху. Потом паки прииде на Круна с великою силою Михаил, но и его Крун порази и едва Михаил кесар с неколико убежа в Цар град. После Михаила наста цар Лев Арменин и он собра великое воинство и удари болгарскую землю. Но и его Крун прия лепо и воинство его порази, и Андрианопол поработи, и много християни посече и поработи, и в болгарскую землю отведе. Тогда плени и святаго Василия Андрианополскаго и с ним много священници и християни. И от сих пленников многия болгары вероваша в веру християнскую. И в то время святой Кирилл философ написа болгаром книгу по своему языку сущим при Дунай реце живущим християном.